

四庫全書

子部

欽定四庫全書

藝文類聚卷第七

唐 歐陽詢 撰

山部上

總載山
衡山

崑崙山
廬山

嵩高山
太行山
華山
荆山

鍾山
燕然山

北芒山
羅浮山

天台山
九疑山

首陽山

總載山

春秋說題辭曰山之為言宣也含澤布氣調五神也

國語曰禹封九山山者土之聚也

論語曰仁者樂山

春秋元命苞曰山者氣之包含所以含精藏雲故觸石而出

爾雅曰山西曰夕陽山東曰朝陽又曰山大而高曰崧山小而高曰岑多草木曰屺無草木曰岵石戴土謂之崔嵬土戴石為岨

禮記曰夫山一拳石之多及其廣大草木生之禽獸居之寶藏興焉

史記曰黃帝東至于海登九山西至于崆峒登雞頭南

至熊湘北逐獫鬻合符釜山

蜀王本紀曰天為蜀王生五丁力士能移山秦王獻美女與蜀王蜀王遣五丁迎女見一大蛇入山穴中五丁并引蛇山崩秦五女皆上山化為石

河圖曰武關山為地門上為天高星主圉圉岐山在崑崙東南為地乳上為天廉星汶山之地為井絡帝以會昌神以建福上為天井

呂氏春秋曰何謂九山會稽太山王屋首陽山太華岐

山太行羊腸孟門

漢名臣奏曰漢得陰山匈奴長老過之未嘗不哭

地鏡曰八名山必先齋五十日牽白犬抱白雞以鹽一
勝山神大喜芝草異藥寶玉為出未到山百步呼曰林
林央央此山王名知之却百邪

袁山松宜都記曰郡西北陸行四十里有丹山山間
時有赤氣籠蓋林嶺如丹色因以名山又曰自西陵
東北陸行百二十里有方山其嶺四方素崖如壁天清

明時有黃影似人像山上有神祠場特生一竹茂好
其標垂場中場中有塵埃則風起動此竹拂去如灑
掃者

盛弘之荊州記曰宜都西南峽中有黃牛山江湍紆迴
途經信宿猶望見之行者語曰朝發黃牛暮宿黃牛三
日三暮黃牛如故又曰桂陽郡西南五十里有萬歲山
有石室鍾乳山上悉生靈壽木又曰武陵舞陽縣有淳
于白雉二山在寧州武陵二界畔絕壑之半有一石雉

遠望首尾可長二丈伸足翔翼若虛中翻飛頭綴著石
又曰衡山有三峯極秀一峯名紫蓋又曰宜都夷道縣
西南九十里有望州山四面壁立登此見一州內東有
涌泉欲雨輒有赤氣故名丹水又曰宜都宜昌縣三峽
七百里兩岸連山略無絕處漁者歌曰巴東三峽巫峽
長

荆南圖制曰宜都夷陵縣東六十里南岸有荆門山北
有虎牙二山相對虎牙有石壁其文黃赤又似虎牙形

荆門山上合下空有若門象又曰鄧城西七里有作樂山諸葛亮常登此山為梁甫吟又曰襄陽郡中廬縣西百三十里有馬穴山傍有一地道云漢時有馬出其中又曰宜都夷陵縣西八十里有高筐山古老相傳堯時大水此山不沒如筐篚因以為名又曰巴東昆陽縣東南十里有栢枝山有石泉口方數丈中有魚又曰宜都夷道縣北有女觀山昔有思婦登山絕望懷思而死葬之山頂山遂枯悴因以名山

庾仲雍湘中記曰桂陽郴縣東北五里有馬嶺山高六百餘丈蘓耽所栖遊處因而得仙後有見耽乘白馬還此山中世因名為馬嶺

晏子春秋曰齊景公召羣臣問曰天不雨久矣民有饑色吾卜祟在高山廣澤寡人欲祠靈山可乎晏子曰夫靈山因以石為身以草木為毛髮天久不雨髮將焦身將熱獨不欲雨乎祠之何益

淮南子曰牛蹄之涔無尺之鯉頽府之山無丈之材所

以然者何也皆其營守狹小而不能容巨大

韓詩外傳曰仁者何以樂山山者萬物之所瞻仰也草木生焉萬物殖焉飛鳥集焉走獸休焉吐生萬物而不私焉出雲導風天地以成國家以寧此仁者所以樂山張璠漢記曰梁冀聚土築山十里九坂以象二嶠窮極工巧積金玉明珠充牣其中

相冢書曰青烏子稱山望之如却月形或如覆舟葬之出富貴山望之如雞栖葬之滅門山有重疊望之如鼓

吹樓葬之連州二千石

遊名山志曰玉溜山一名地肺山一名浮山

魏志曰明帝鑿太行山之石英採穀城之文石起景陽山於芳林園

王韶之始興記曰郡東有玉山草木滋茂泉石澄潤

鄧德明南康記曰平固縣覆笥山上有笥貯玉牒記故山因笥為名焉

詩晉庾闡登楚山詩曰拂駕升西嶺寓目臨浚波想望

七德耀詠此九功歌龍駟釋陽林朝服集三河回首盼
宇宙一無濟邦家

晉王凝之妻謝氏詩曰我我東嶽高秀極冲清天巖中
閒虛宇寂漠幽以玄非工復非匠雲構發自然器象爾
何物遂令我屢遷逝將宅斯宇可以盡天年

宋孝武遊覆舟山詩曰束髮好怡衍弱冠頗流薄素想
終勿傾聿來果丘壑層峯亘天維曠渚綿地絡逢臯列
神苑遭壇樹仙閣松塏含青暉荷源煜彤爍川界泳遊

鱗巖庭響鳴鶴又登作樂山詩曰修路軫孤轡竦石頓
飛轅遂登千尋首表裏望丘原屯煙擾風穴積水溺雲
根漢潦吐新波楚山帶舊苑壤草凌故國拱水秀頽垣
目極情無屆客思空已繁又登魯山詩曰解帆憩通渚
息徒憑椒丘粵值風景和升高從遠眸紀鄴窮西路湘
夢極南流杳哉漢陰水浩焉江界修

宋謝靈運往北山經湖中詩曰石橫水分流林密蹊絕
蹤初篁苞綠籜新蒲合紫茸海鷗戲春岸天雞弄和風

宋宗炳登白鳥山詩曰我徂白鳥山因名感昔擬仰升
數百仞俯覽眇千里杲杲羣木分岌岌衆巒起又登半
石山詩曰清晨陟阻崖氣志洞蕭灑嶰谷崩地幽窮石
凌天委長松列竦肅萬樹巉巖詭上施神農蘿下凝堯
時髓

齊謝朓和王著作登八公山詩曰東限瑯琊臺西距孟
諸陸阡眠起雜樹壇藥陰修竹日隱瀾疑空雲聚岫如
複出沒眺樓雉遠近送春日又遊敬亭山詩曰茲山亘

百里合沓與雲齊上干蔽白日下屬帶迴溪交藤荒且
蔓樛枝聳復低獨鶴方朝唳饑鶻此夜啼泄雲已漫漫
多雨亦淒淒

梁沈約遊金華山詩曰遠策追夙心靈山協久要天倪
臨紫闕地道通丹竅未乘琴高鯉且縱嚴陵釣若蒙羽
駕迎得奉金書召高馳入閭闔方覩靈妃笑

又留真人東山還詩曰連峯竟無已積翠遠微微寥戾
野風急芸黃秋草腓我來歲云暮於此悵懷歸霜雪方

共下寧止露霑衣待余兩岐秀去去掩柴扉

梁范雲登三山詩曰仄徑崩且危叢巖竦復垂石藤多
卷節水樹饒蟠枝海中昔自重江上今如斯

梁江淹歷山詩曰愁生白露日思起秋風年竊悲杜蘅
暮攬涕即空山落葉下楚水別鶴噪吳田嶂氣陰不極
日色半虧天酒至情蕭瑟憑樽還惘然又遊黃檗山詩
曰長望竟何極聞雲連越邊南州饒竒怪赤縣多靈仙
金峯各虧日銅石共臨天陽岫昭鷺采陰谿噴龍泉雞

鳴丹壁上猿嘯青崖間

梁任昉奉和登影陽山詩曰物色感神遊升高悵有閤
南望銅駝街北走長楸埒別澗苑滄溟疏山駕瀛碣奔
鯨吐華浪司南動輕柅日下重門照雲開九華澈觀閤
隆舊恩奉圖愧前哲

梁庾肩吾遊甌山詩曰去子平已久餘風今復追未必
遊春草王孫自不歸寒雲間石起秋葉下山飛

周王褒明慶寺石壁詩曰夏水懸臺際秋泉帶雨餘石

生銘字長山久谷神虛又雲居寺高頂詩曰中峯雲已
合絕頂日猶晴邑居隨望近風煙對眼生

周庾信陪駕幸終南山詩曰玉山乘四載瑤池宴八龍
黿橋浮少海鵠蓋上中峯飛狐橫塞路白馬當河衝水
奠三川后山封五樹松長虹雙瀑布圓闕兩芙蓉戍樓
鳴夕鼓山寺響晨鐘新蒲節轉促短筍籜猶重樹宿含
櫻鳥花留釀蜜蜂迎風下列缺醺酒召昌容且欣陪北
上方欲待東封

陳張正見賦得山卦名詩曰蓬萊遁羽客巖穴轉蒙籠
雲歸仙井暗霧解石橋通影帶臨峯鶴形隨雜雨風尋
師不失路咸欲馭飛鴻

賦魏劉楨黎陽山賦曰自魏都而南邁迄洪川以竭休
想王旅之旌旄望南路之遐修御輕駕而西徂過舊塢
之高區爾乃踰峻嶺超連罡一登九息遂臻其陽南蔭
黃河左覆金城青壇承祀高碑頌靈珍木駢羅奮華揚
榮雲興風起蕭瑟清泠延首南望顧瞻舊鄉桑梓增敬

慘切懷傷河源汨其東遊陽烏飄而南翔觀衆物之集
華退欣欣而樂康

晉潘岳登虎牢山賦曰辭京輦兮遙邁將遠遊兮東夏
朝發軔兮帝壙夕結軌兮中野憑修坂兮停車臨寒泉
兮飲馬眷故鄉之遠隔思紆軫以鬱陶步玉趾以升降
凌汜水而登虎牢覽河洛之二川眺成平之雙臯崇嶺
巖以崔嵬幽谷豁以寥寥路逶迤以迫隘林廓落以蕭
條爾乃仰蔭嘉木俯藉芳卉青煙鬱其相望棟宇懷以

鱗萃彼登山而臨水固先詰之所哀矧去鄉而離家邈
長辭而遠乖望歸雲以歎息腸一日而九迴良勞者之
詠事爰寄言以表懷

晉郭璞巫咸山賦曰蓋巫咸者實以鴻術為帝堯醫生
為上公死為貴神豈封斯山而因以名之乎伊巫咸之
名山崛孤停而嵒峙體岑峭以隆頽冠崇嶺以峻起配
華霍以助鎮致靈潤乎百里爾乃寒泉懸涌浚湍流帶
林薄叢籠幽蔚隱藹八風之所歸起遊鳥之所喧會潛

瑕石揚蘭茝迴翔鵷集凌鵠鷗翳禽鳥栖陽以晨鳴熊
虎窟陰而夕嘑

梁江淹江上之山賦曰挂青蘿兮萬仞豎丹石兮百重
百重兮崒嵒如斲兮如削波潮兮吐納嶠岸兮積沓見
紅草之交生眺碧樹之四合草自然而千華樹無情而
百色嗟世道之異茲牽憂患而來逼

梁吳筠八公山賦曰峻極之山蓄聖表仙南參差而望
越北邇迤而懷燕爾其盤栢基固含陽藏霧絕壁嶮巖

層巖迴互桂皎月而常團雲望空而自布袖以華閭帶
以潛淮文星亂石藻日流堦若夫神基巨鎮而卓犖荆
河箕風畢雨育嶺生莪高岑直兮蔽景修坂出兮架天
以迎雲而就日若從漢而迴山露泣葉而原淨花照磯
而岫鮮促嶂萬尋平崖億絕上被紫而煙生傍帶花而
來雪維英王兮好仙會八公兮小山駕飛龍兮翩翩高
馳翔兮冲天

陳張正見山賦曰何神山之峻美諒苞結之所成東垂

曰泰南服稱衡西戎所擅北狄標名於是克值洪流滔
天襄陵禹敷水土奠高槁木衆川既導羣岳自修潛通
四瀆鎮壓九州森羅辰象吐吸雲霧深不可測遠不可
步於廓靈山長為作固爾其為狀也則武當太和武功
太白崑崙五門扶寧三石峯高一萬峭峙三百登而眺
之則千里無極俯而臨之則萬仞難測映白鶴而同高
混青天而共色

晉潘尼西道賦曰異山河之岨阨倦關谷之盤紆車低

側於潛軌馬侘傺於險塗狗肘還勾羊角互戾薊窟連
投十數億計石子之澗坎埴之穴支體為之危竦形骸
為之疲曳此亦行者之艱難羈旅之困斃若其名坂則
羊羹八特成臯黃馬迴波激浪飛沙飄瓦馬則頓躑狼
傍虺頽玄黃牛則體疲力竭損食喪膚蹠蹄穿嶺摩髀
脫軀

吟晉夏侯湛山路吟曰夙駕兮待明陟山路兮遐征冒
晨朝兮入大谷道逶迤兮嵐氣清攬轡兮抑馬踟躕兮

曠野曠野
軀兮遠落崇岳兮崑崙丘陵兮連離卉木兮
交錯淥水兮長流驚濤兮拂石

宋謝莊山夜憂曰庭光盡山明歸流風乘軒卷明月緣
河飛澗鳥鳴兮夜蟬清橘露靡兮蕙煙輕凌別浦兮值
泉躍經喬林兮遇猿驚南臯別鶴佇行漢東鄰孤管入
青天沉疴白髮共急日朝露過隙詎賒年年去兮髮不
還金膏玉液豈留顏迴舲拓繩戶收棹掩荆關

贊晉庾肅之山贊曰懸巖沓翳神明攸居官府風雲懷

吐川渠崑閬天竦五岳雲停飛峯紫蔚辰秀太清

晉戴逵山贊曰蔚矣名山亭亭洪秀並基二儀崑嶠雲
構嵯峨積岵寥籠虛岫輕霞下拂神泉旁漱曰仁奚樂
惟茲比壽

晉郭璞炎山贊曰木含陽氣精構則燃焚之無盡是生
火山理見乎微其妙在傳

銘晉張載劒閣銘曰巖巖梁山積石嵯嵯遠屬荆衡近
綴岷嶠南通邛僊北達褒斜狹過彭碣高踰嵩華惟蜀

之門作固作鎮是曰劔閣壁立千仞窮地之險極路之峻世濁則逆道清斯順閉由往漢開自有晉秦得百二并吞諸侯齊得十二田生獻籌矧茲狹隘土之外區一人荷戟萬夫趑趄形勝之地非親勿居昔在武侯中流而喜山河之固見屈吳起興實在德險亦難恃洞庭孟門二國不祀自古迄今天命匪易憑阻作昏眇不敗績公孫既滅劉氏銜壁覆車遺軌罔或重跡勒銘山阿敢告梁益

晉湛方生靈秀山銘曰巖巖靈秀積岵幽重傍嶺闕岫
乘標挺峯桂柏叅幹芝菊亂叢翠雲久映爽氣晨蒙籠
籠疎林穆穆閒房幽室冬暄清陰夏涼神木竒生靈草
真香雲鮮其色風飄其芳可以養性可以栖翔長生久
視何必仙鄉

梁簡文帝行雨山銘曰巖畔途遠阿曲路深猶云息馭
尚且抽琴茲峯獨擅嵌崎千變却繞畫房前臨寶殿玉
岫開華紫水迴斜谿間聚葉澗裏縈沙月映成水人來

當花藤結如帷磧起成基芸香馥逕石鏡臨墀又明月
山銘曰迢遞峯長威紆岳聚既正書門兼同天柱非競
小山寧論大庾豈學土龍詎湏石鼓鰕色斜臨霞文橫
豎

梁孝元帝東宮後堂仙室山銘曰太華削成本擅奇聲
峯如雪委嶺若蓮生雲除紫蓋霞通赤城金壇是籙玉
記題名鳳依桐樹鶴聽琴聲殿接南箕橋連北斗秋河
從帶春禽銜綬朱鳥安窓青龍作牖

梁庾肩吾東宮玉帳山銘曰玉帳寥廓崑山抵鵲摠葉
成帳連枝起幕玉藥難徙金花不落隱士彈琴仙人看
博巖留故鼎竈聚新荆煮石初爛燒丹欲成桑田屢盡
海水頻傾長聞鳳笛永聽簫聲

周庾信梁東宮行雨山銘曰山名行雨地異陽臺佳人
無數神女羞來翠幔朝開新粧旦起樹入牀前山來鏡
裏草色衫同花紅面似開年寒盡正月遊春天絲劇藕
蝶粉多塵橫藤礙路垂柳係人誰言洛水一箇河神

陳徐陵後堂望美人山銘曰高堂凝雨洛浦無洲何處
相望山邊一樓峯因五婦石是三侯險逾地肺危鄰天
柱禁苑斜通春人恒聚樹裏聞歌枝中見舞恰對粧臺
諸窓併開遙看已識試喚便迴豈如織女非秋不來

碑梁簡文帝神山碑銘曰開號天井山稱地雌碧雞金
馬越瀆梁池懷靈緼德孕寶含竒此亦仙岫英名遠摘
昔有驚窟不燒淨土邁彼高蹤構茲法宇引葉成帷即
樹為柱石砌危橫崖階斜豎

梁元帝玄圃牛渚磯碑曰竊以增城九重仙林八樹未
有船如鴈鶴時度宓妃橋似牽牛能分織女丹鳳為羣
紫柱成迴清風韻響即代歌仙桂影浮池仍為月浦壁
月朝暉金樓啓扉畫船向浦錦纜牽磯花飛拂袖荷香
入衣山林朝市併覺忘歸

序宋謝靈運名山序曰夫衣食人生之所資山水性分
之所適世識多云歡足本在華堂枕巖漱流者之無大
志故保其枯槁余謂不然君子有愛物之情有救物之

能橫流之弊非才不理故時有屈己以濟彼豈以名利之場賢於清曠之域邪語萬乘則鼎湖有縱轡論儲貳則嵩山有絕控又陶朱高揖越相留侯願辭漢傳推此而言可以明矣

書梁吳筠與施從事書曰故鄆縣東三十五里有青山絕壁于天孤峯入漢緣嶂百重青川萬轉歸飛之鳥千翼競來企水之猿百臂相接秋露為霜春蘿被逕風雨如晦鷄鳴不已信足蕩累頤物悟裏散賞又與朱元思

書曰風煙俱淨天山共色從流飄蕩任意東西自富陽
至桐廬一百許里奇山異水天下獨絕水皆縹碧千丈
見底游魚細石直視無礙急湍甚箭猛浪若奔夾峯高
山皆生寒樹負勢競上互相軒邈爭高直指千百成峯
泉水激石泠泠作響好鳥相鳴嚶嚶成韻蟬則千轉不
窮猿則百叫無絕鳶飛戾天者望峯息心經綸世務者
窺谷忘反橫柯上蔽在晝猶昏踈條交映有時見日

崑崙山

河圖曰崑崙之墟五城十二樓河水出焉

龍魚河圖曰崑崙山天中柱也

大荒西經曰赤水之後黑水之前有大山名曰崑崙之丘有神人面虎身有尾

爾雅曰西北之美者有崑崙之墟璆琳琅玕焉

穆天子傳曰天子遂宿于崑崙之阿赤水之陽吉日辛酉天子升于崑崙之丘以觀黃帝之宮

紀年曰周穆王十七年西征至崑崙丘見西王母王母

止之

神異經曰崑崙有銅柱焉其高入天所謂天柱也圍三千里圓周如削銅柱下有迴屋焉辟方百丈

史記曰禹本紀言河出崑崙崑崙甚高三千五百餘里日月所相避隱為光明也其上醴泉華池自張騫使大夏之後窮河源惡覩本紀所謂崑崙者乎

水經曰崑崙墟在西北去嵩高五萬里地之中也其高萬一千里河水出其東北陬

博物志曰崑崙從廣萬一千里神物之所生聖人神仙之所集五色雲氣五色之流水其泉東南流入中國名為河也

葛仙公傳曰崑崙一曰玄圃一曰積石瑤房一曰閼風臺一曰華蓋一曰天柱皆仙人所居也

搜神記曰崑崙之山地首也是惟帝之下都故其外絕以弱水之深又環以炎火之山山上有鳥獸草木皆生育滋茂於炎火之中故有火澣布非此山之皮帛則其

鳥獸之毛也

贊晉郭璞崑崙丘贊曰崑崙月精水之靈府惟帝下都
西羌之宇嶸然中峙號曰天柱

嵩高山

山海經曰太室之中山其上有木焉葉狀如梨而赤理
而名曰指服者不垢

毛詩曰嵩高山惟嶽峻極于天維嶽降神生甫及申

列仙傳曰王子喬周靈王太子晉也好吹笙作鳳鳴遊

伊雒間道士浮丘公接上嵩高山

漢武帝內傳曰武帝夜夢與李少君俱上嵩高山上半道有繡衣使者乘龍持節從雲中下言太乙君召覺即告近臣曰如朕夢少君將舍朕去矣

劉根別傳曰根棄世學道入中嶽嵩山石室中崢嶸上東南下五十丈北人冬夏不衣身毛皆長一二尺顏狀如年十五時

仙經云嵩高山東南大巖下石孔方圓一丈西方北入

五六里有太室高三十餘丈周圓三百步自然明燭相見如日月無異中有十六仙人云月光童子常在天台時亦往來此中人非有道不得望見

戴延之西征記曰嵩高山巖中也東謂太室西謂少室相去七十里嵩高總名也

世記曰嵩高山北有大穴莫測其深百姓歲時每遊觀其上晉初嘗有一人誤墮穴中同輩冀其儻不死乃投食於穴中墜者得之為尋穴而行計可十許日忽曠然

見明又有草屋中有二人對坐圍碁局下有一杯白飲
墜者告以饑渴碁者曰可飲此墜者飲之氣力十倍半
年許乃出于蜀中歸洛下問張華張華曰此仙館大夫
所飲者玉漿也

俗說曰傅亮北征在黃河中垂至洛遙見嵩高山于時
同從客在坐問傅曰潘安仁懷舊賦云前瞻太室傍眺
嵩丘嵩丘太室故是一山何以言傍眺傅曰有嵩丘山
去太室七十里此是書寫誤耳

贊晉郭璞太室山贊曰嵩惟嶽宗華岱恒衡氣通元漠
神洞幽明巍然中立衆山之英

華山

爾雅曰華山為西嶽

西山經曰太華之山削成而四方其高五千仞其廣十
里

晏子曰君子若華山然松柏既多矣望之盡日不知厭
列仙傳曰修陽公者魏人止華陰山石室中中有石榻

常卧其上石盡陷穿又曰呼子先者漢中關下卜師壽百餘歲臨去呼酒家嫗令急裝便有仙人持二茅狗來至子先將一與酒嫗因各騎之乃龍也上華陰山常於山大呼言子先酒母在此

華山記曰華山高巖四合重嶺秀起上有石池北有石鼓父老相傳云嘗有聞其鳴者

述征記云華山對河東首陽山黃河流于二山之間云本一山巨靈所開今睹手跡於華嶽而腳跡在首陽山

下

贊晉郭璞華山贊曰華嶽靈峻削成四方爰有神女是挹玉漿其誰遊之龍駕雲裳

銘晉傅玄華嶽銘序曰易稱灋象莫大乎天地天以高明崇顯而嶽配焉地以廣厚為基而嶽體焉若夫太華之為鎮也五嶽列位而存其首三條分方而處其中故能叅兩儀以比德協和氣之絪縕故雲行與雨施興雷風以動物是以古先歷代聖帝明王莫不燔柴加牲尊

而祀焉於虞書則西巡狩至于西嶽而親祭焉於禮則大司馬掌其分域而太宗伯典其禮祀也

碑後漢張昶西嶽華山堂闕碑序曰易曰天地定位山澤通氣然山莫尊於嶽澤莫盛於瀆岳有五而華處其一瀆有四而河在其數其靈也至矣人主廢興必有其應故岱山石立中宗繼統太華授璧秦胡絕緒白魚入舟姬武建業寶珪出水子朝喪位布五方則處其西列三條則居其中世宗又經集靈之宮於其下想松喬之

儔是遊是憩郡國方士自遠而至者充巖塞崖鄉邑巫覡宗祝乎其中者亦盈谷溢蹊咸有浮飄之志愉悅之色必雲霄之路可外而越果繁昌之福可降而致也故殖財之寶黃玉自出令德之珍卿相是毓匪惟嵩高降生申甫斯亦有焉

衡山

周官曰荊州之鎮山曰衡山

湘中記曰衡山九疑皆有舜廟遙望衡山如陣雲沕湘

千里九向九背乃不復見又曰南陽劉道人嘗遊衡山
行數十里有絕谷不得前遙望見三石困二困閉一困
開

盛弘之荊州記曰衡山有三峯極秀一峯名芙蓉峯最
為竦桀自非清霽素朝不可望見峯上有泉飛派如一
幅絹分映青林直注山下

異苑曰湘東姚祖太元末為郡吏經衡山望巖下有數
年少並執筆作書祖謂是行侶休息乃枉道過之未至

百許步少年相與翻然飛颺

詩晉庾闡詩曰北眺衡山首南睨五嶺末寂坐挹虛恬
運目情四豁翔亂凌霄陸鱗困濡沫既體江湖悠安
識南溟闊

廬山

山海經曰廬山名有二一曰天子都二曰天子鄣

伏滔遊廬山序曰廬山者江陽之名嶽其大形也背岷
流面彭蠡蟠根所據亘數百里重嶺桀嶂仰挿雲日俯

瞰川湖之流焉

遠法師廬山記曰東南有香鑪山孤峯秀起遊氣籠其上則焚氲若煙

神仙傳曰董奉還豫章廬山下居在山間了不佃作為人治病亦不取錢物使病愈者種杏五株

張野廬山記曰廬山天將雨則有白雲或冠峯巖或亘中嶺俗謂之山帶不出三日必雨

周景式廬山記曰匡裕周威王時生而神靈廬於此山

世稱廬君故山取號焉又曰登廬山望九江以觀禹之
跡其茲峯乎東南隱諸嶺不得駢矚自廬山人迹所暨
迴望處無復出此者又甚高峻每雨其下成潦而上猶
皎日峯頭有大盤石可坐數百人

詩宋謝靈運登廬山絕頂望諸嶠詩曰積峽忽復啓平
塗俄已閉巒隴有合沓往來無蹤轍晝夜蔽日月冬夏
共霜雪

宋鮑昭登廬山詩曰懸裝亂水區旅薄次山楹千巖狀

岨積萬壑勢迴縈
龍從高昔貌紛亂
襲前名洞澗窺地
脉疎樹隱天經松
磴上迷密雲竇下
縱橫陰冰實夏結
炎樹信冬榮又登
廬山望石門詩曰
明發振雲冠升漣
遠栖趾高峯隔半
天長崖斷千里雞
鳴青澗中猿嘯白
雲裏瑤波逐穴開
霞石觸峯起迴互
非一形參差悉相
似

梁江淹登廬山香
鑪峯詩曰絳氣下
縈薄白雲上杳冥
中坐瞰蜿蜒虹俛
伏視流星日落長
沙渚曾陰萬里生
藉

蘭素多意臨風默含情

賦宋支曇諦廬山賦曰佳哉壯麗峻極氤氲包靈奇以
藏器蘊絕峯乎青雲景澄則巖岫開鏡風生則芳林流
芬嶺奇故神明鱗萃路絕故人跡自分嚴清升山於玄
崖世高垂化於邾亭應真陵雲以踞峯眇忽翳景而入
冥咸豫聞其清塵妙無得之稱名也若其南面巍崖北
背道華懸雷分流以飛湍七嶺重嶮而疊勢映以竹柏
蔚以桤松縈以三湖帶以九江嗟四物之蕭森與獨秀

於玄冬美二流之潺湲津百川之所衝峭門百尋峻闕
千仞香鑪吐雲以像煙甘泉涌雷而先潤

碑梁元帝廬山碑序曰夫日月麗天皇穹所以貞觀川
嶽帶地后土所以維寧廬山者亦南國之德鎮雖林石
異勢而雲霞共色長風夜作則萬流俱響晨颺曉吟則
百嶺齊應東瞻洪井識曳帛之在茲西望石梁見指寶
之可拾誠後慕類易悲山中難久攀蘿結桂多見淹留

太行山

山海經曰太行山其首曰歸山其上有金玉下有碧玉
穆天子傳曰天子命駕八駿之乘赤驥之駟南征翔行
逕絕翟道升于太行南濟于河

墨子曰墨子請耕桂嶺子曰將上太行駕驥與牛子將
誰驅曰將驅驥以驥足貴也

尸子曰龍門魚之難也太行牛之難也以德報怨人之
難也

戰國策曰范雎說秦王曰舉兵攻滎陽則成臯之路不

通北溟太行之道則上黨之兵不下王舉兵而攻滎陽
則其國斷為三

神仙傳曰王烈入太行山忽聞山東北雷聲往視見山
上破數百丈石中有一孔徑尺中有青泥流出烈取搏
之隨手堅凝氣味如粳米飯

詩晉袁宏從征行方山頭詩曰峩峩太行凌虛抗勢天
嶺交氣窈然無際澄流入神玄谷應契四象悟心幽人
來憩

荊山

山海經曰荊山其陰多鐵其陽多赤金

河圖括地象曰荊山為地雌上為軒轅星

韓子曰卞和得玉於楚山中獻厲王王使玉人相之曰石也刖其左足和抱其璞哭於荊山之下三日泣盡繼之以血

水經曰荊山在南郡臨沮縣東北

詩晉桓玄登荊山詩曰理不孤湛影比有津曾是名嶽

明秀超鄰器栖荒外命契響神我之懷矣巾駕飛輪
梁江淹望荆山詩曰奉詔至江漢始知楚塞長南關繞
桐柏西岳出魯陽寒郊無留影秋日懸清光悲風繞重
林雲霞肅川漲歲晏君如何零淚霑衣裳

鍾山

徐爰釋門略曰建康北十餘里有鍾山舊名金山漢末
金陵尉蔣子文討賊戰亡靈發於山因立蔣侯祠故世
號曰蔣山

庾闡揚都賦注曰建康宮北十里有蔣山輿地圖謂之鍾山元皇帝未渡江之年望氣者云蔣山上有紫雲時時晨見

山譙之丹陽記曰京師南北並有連嶺而蔣山獨隆崕峻異其形象龍實揚都之鎮也

孫權葬山南因山為名號曰蔣陵

沈約宋書曰蕭思話領左衛嘗從太祖登鍾山北嶺石上彈琴因賜以銀酒鍾

詩梁沈約遊鍾山詩曰靈山紀地德地險資岳靈終南
表秦館少室邇王城比阜何其峻林薄杳蔥青發地多
奇嶺千雲非一狀合沓共隱天參差互相望鬱律構丹
巘峻嶒起青嶂即事既多美臨眺殊復奇南矚儲胥觀
西望昆明池中咸可悅賞逐四時移春光發隴首秋
風生桂枝多值息心侶結架山之足八解鳴澗流四禪
隱巖曲

梁虞騫登鍾山下峰望詩曰冠者五六人攜手巖之際

散意百仞端極目千里睇疊岫乍昏明浮雲時卷閉遙
看野樹短遠望樵人細

北芒山

魏志曰明帝即位欲平北芒令登臺觀見孟津廷尉辛
毗諫曰天地之性高高下下今而反之既非其理加以
損費人功民不堪後且若九河盛溢洪水為害而丘陵
皆夷何以禦之帝乃止

朱超石與兄書曰登北芒遠眺衆美都盡光武墳邊杏

甚美今奉送核

詩魏劉伶北芒客舍詩曰決滂望舒隱黥黯玄夜陰寒
雞思天曙擁翅吹長音蚊蚋歸豐草枯葉散蕭林陳醴
發悴顏色覲暢真心溫被終不曉斯歎信難任何以除
斯歎付之與瑟琴長笛響中夕聞此消胃衿

賦晉張協登北芒賦曰陟巒丘之巖岷升逶迤之修坂
迴余車於峻嶺聊送目於四遠靈嶽鬱以造天連岡巖
以蹇產伊洛混而東流帝居赫以崇顯山川汨其常兮

萬物化而代轉何天地之難窮悼人生之危淺歎白日
之西頽兮哀世路之多蹇於是徘徊絕嶺跼蹐步趾前
瞻狼山却闕大岷東眺虎牢西睨熊耳邪亘天際旁極
萬里莽眩眼以茫昧諒羣形之難紀臨千仞而俯看似
遊身于雲霓撫長風以延佇想凌天而舉翮瞻冠蓋之
悠悠覩商旅之接輅爾乃地勢窅隆丘墟陂陀墳隴岷
疊碁布星羅松林慘映以攢列玄木搜寥而振柯壯漢
氏之所營望五陵之嵬我喪亂起而啓壤僮豎登而作

歌

天台山

名山略記曰天台山在剡縣卽是衆聖所降葛仙公山也

異苑曰會稽天台山雖非遐遠自非平生忘形不能躋也

幽明錄曰漢帝永平五年剡縣劉晨阮肇共入天台山度山出一大溪溪邊有二女子資質妙絕遂留半年懷

土求歸既出親舊零落邑屋改異無復相識訊問得七世孫

孔靈符會稽記曰赤城山內則有天台靈嶽玉室璿臺賦晉孫綽遊天台山賦序曰天台山者蓋山嶽之神秀者也涉海則有方丈蓬萊登陸則有四明天台皆玄聖之所遊化靈仙之所窟宅夫其峻極之狀嘉祥之美窮山海之瓌富盡人神之壯麗矣所以不列於五嶽闕載於常典者豈不以其所立冥奧其路幽迴或倒景於重

溟或匿峯於千嶺始經魑魅之塗卒踐無人之境舉世罕能登陟王者莫由裡祀理無隱而不彰啓二竒以示兆赤城霞起以建標瀑布飛流以界道

首陽山

毛詩曰采苓采苓首陽之顛

論語曰伯夷叔齊餓于首陽之下

史記曰伯夷叔齊孤竹君之二子讓國逃去隱於首陽山採薇而食之遂餓死首陽山

詩魏阮籍詩曰步出上東門遙望首陽岑下有採薇士
上有嘉樹林

賦漢杜篤首陽山賦曰嗟首陽之孤嶺形勢窟其槃曲
面河源而抗巖隴埴隈而相屬長松落落卉木蒙蒙青
羅落漠而上覆穴溜滴瀝而下通高岫帶平巖側洞房
隱於雲中忽吾覩兮二老時采薇以從容於是乎乃訊
其所求問其所修州域鄉黨親戚足儔何務何樂而並
茲遊矣其二老乃荅余曰吾殷之遺民也厥胤孤竹作

蕃北湄少名叔齊長曰伯夷聞西伯昌之善教育年艾

於胡耆

舉后切

遂相攜而隨之冀寄命乎餘壽而天命之

不常伊事變而無方昌伏事而畢命子忽遘其不祥乃
興師於牧野遂干戈以伐商乃棄之而來遊誓不步於
其鄉余閉口而不食並卒命於山傍

燕然山

漢書匈奴傳曰貳師引兵還至燕然山單于知漢軍勞
倦自將五萬騎遮擊貳師軍大亂敗貳師降單于

銘後漢班固燕然山銘曰勒以八陣蒞以威神玄甲耀
日朱旗絳天遂陵高闕下雞鹿經磧鹵絕大漠斬溫禺
以繫鼓血尸逐以染鏑然後四校橫徂星流彗掃蕭條
萬里野無遺寇於是城滅區殫反旆而旋鑠王師兮征
荒裔勦凶虐兮截海外復其邈兮亘地界封神丘兮建
隆嵴熙帝載兮振萬世

羅浮山

茅君內傳曰太天之内有地中之洞天三十六所羅浮

山之洞周迴五百里名曰朱明曜真之天

袁彥伯羅浮山疏曰遙望一石樓直上當十餘里許石樓之於山頂十分之一耳去縣三十里便見山基至所登處當百里許山皆平敞極目

羅浮山記曰羅浮者蓋總稱焉羅羅山也浮浮山也二山合體謂之羅浮在增城博羅二縣之境舊說羅浮高三千丈有七十石室七十二長溪神明神禽玉樹朱草詩宋王叔之遊羅浮山詩曰菴藹靈嶽開景神封綿界

盤趾中天舉峯孤樓側挺增岫迴重風雲秀體卉木媚容

賦宋謝靈運羅浮山賦曰客夜夢見延陵茅山在京之東南明旦得洞經所載羅浮山事云茅山是洞庭口南通羅浮正與夢中意相會遂感而作羅浮山賦曰若乃茅公之說神化是悉數非億度道單悵悵古穴切洞天有

九此惟其七潛夜引輝幽境朗日故曰朱明之陽宮耀真之陰室洞穴之寶衡海靈之雲術伊離情之易結諒

沉念之羅浮發潛夢於永夜若憇波而乘桴越扶嶼之
細漲上增龍之合流鼓蘭枻以水宿杖桂策以山遊

九疑山

山海經曰南方蒼梧之丘蒼梧之川其中有九疑山焉
舜之所葬在長沙零陵界

楚辭九歌曰九疑繽兮並迎

淮南子曰九疑之南陸事寡而水事多


漢書曰武帝南巡狩至于盛唐望祀虞舜于九疑

湘中記曰九疑山在營道縣九山相似行者疑惑故名九疑

名山略記曰九疑山漢末有張禮正魏時有治明期南遊九疑禮正服黃精明期服澤瀉柏實後俱適西城若受虹景方兼以守一內外洞澈東華迎而乘雲升天

詩庾闡採藥詩曰採藥靈山嶠結駕登九疑懸巖漏石髓芳谷挺丹芝泠泠雲珠落漼漼玉蜜滋解景染冰顏
妙氣翼冥期

碑漢蔡邕九疑山碑曰巖巖九疑峻極于天觸石膚合
興播建雲時風嘉雨浸潤下民芒芒南土實賴厥勛逮
于虞舜聖德光明克諧頑傲以孝蒸蒸師錫帝世堯而
授徵受終文祖璇璣是承泰階以平入以有終遂葬九
疑解體而升登此崔嵬託靈神仙



藝文類聚卷七

欽定四庫全書

子部

藝文類聚卷八

詳校官中書_臣李彤

員外郎_臣牛稔文覆勘

總校官知縣_臣楊懋珩

校對官主事_臣胡敏

謄錄監生_臣宋益源

欽定四庫全書

藝文類聚卷八

唐 歐陽詢 撰

山部下

虎丘山 石門山

蒜山 太平山

石帆山 岷山

石鼓山 會稽諸山

交廣諸山

虎丘山

虎丘山銘曰晉司徒東亭獻公王珣撰云武丘山先名

海涌山

吳越春秋曰闔廬死葬於國西北名虎丘穿土為川積

金志卷八
壤為丘發五都之士十萬人共治千里使象搏土冢池
四周水深丈餘槲三重傾水銀為池池廣六十步黃金
珠玉為鳧鴈專諸之劍魚腸三千在焉葬之已三日金
精上陽為白虎據墳故曰虎丘

王珣虎丘記曰山大勢四面周嶺南則是山逕兩面壁
立交林上合蹊路下通升降窈窕亦不卒至

詩張正見從永陽王遊虎丘山詩曰滄波壯鬱鳥洛邑
鎮崇芒未若茲山麗岵嶢擅水鄉地靈侔少室塗艱像

太行重巖標虎據九曲峻羊腸溜深澗無底風幽谷
自涼寶沈餘玉氣劍隱絕星光白雲多異影丹桂有
藜香遠看銀臺竦洞塔耀山莊瑞草生金地天花照石
梁

序晉顧愷之虎丘山序曰吳城西北有虎丘山者含真
藏古體虛窮玄隱嶙陵堆之中望形不出常阜至乃出
粵絕於華峰

陳顧野王虎丘山序曰夫少室作鎮以峻極而標奇太

華神掌以削成而稱貴若茲山者高不概雲深無藏影
卑非培塿淺異棘林秀壁數尋被杜蘭與苔蘚椿枝十
仞挂藤葛與懸蘿曲澗潺湲修篁蔭映路若絕而復通
石將頽而更綴抑巨麗之名山信大吳之勝壤若乃九
功六義之興依永和聲之製志由興作情以詞宣形言
諧於韶夏成文暢於鐘律由來尚矣未有登高能賦而
韜斐麗之章入谷忘歸而忽鏗鏘之節故總轡齊鑣競
雕蟲於山水雲合霧集爭歌頌於林泉于時風清邃谷

景麗修巒蘭佩堪紉胡繩可索林花翻灑乍颺颺於蘭
華山禽囀響時弄聲於喬木班草班荆坐蟠石之上濯
纓濯足就滄浪之水傾縹瓷而酌旨酒剪綠葉而賦新
詩肅爾若與三逕齊蹤鎗然似共九成偕韻盛矣哉聊
述時事寄之翰墨

書陳張種與沈炯書曰虎丘山者吳岳之神秀者也雖復
峻極異於九天隱磷殊於太一衿帶城傍獨超衆嶺控統
川澤順絕羣岑若其峰崖剝削窮造化之瑰詭絕澗杳

冥若鬼神之髣髴珍木靈草茂瓊枝與碧葉飛禽走獸
必負義而膺仁是以歷代高賢輕舉栖託梵臺雲起寶
刹星懸自非玉牒開祥金精蘊耀豈其神怪若此者乎
陳沈炯荅書曰若乃三江五湖洞庭巨麗寫長洲之茂
苑登九曲之層臺山高水深雲蒸霧吐其中之秀異者
實虎丘之靈阜焉冬桂夏柏長蘿修竹靈源秘洞轉側
超絕遠澗深崖交羅戶穴

蒜山

劉禎京口記曰蒜山無峯嶺北縣臨江中魏文帝南望而致歌

山謙之南徐州記曰蒜山北江中有伏牛山

詩宋顏延之侍遊蒜山詩曰睿思纏故里巡駕匝舊堦
陟峯騰輦路尋雲抗瑤輦春江壯風濤蘭野茂蕙英宣
遊弘下濟窮遠凝聖情

宋謝莊侍宴蒜山詩曰龍旌拂紆景鳳蓋起流雲轉蕙
方因委層華正氛氲烟竟山郊遠霧罷江天分調石飛

延露裁金起承雲

石帆山

盛弘之荊州記曰武陵舞陽縣有石帆山若數百帆
謝靈運遊名山志曰破石溪南二百餘里又有石帆修
廣與破石等度質色亦同傳云古有人以破石之半為
石帆故名彼為石帆此名破石

銘宋鮑昭石帆銘曰應龍剖流息石橫波下濫地軸上
猶星羅牽湘引漢欬蠡吞池西歷岷嶓北寫淮河渺淼

泓藹積廣連深淪天測際亘海窮陰雲旌未起風柯不
吟崩濤山逐鬱浪雷沉穆戎遂留昭御不還徒悲猿鶴
空駕滄煙

石鼓山

臨海記曰郡西白鶴山有石鼓石槌世云石鼓鳴則土
地寇亂隆安初此鼓屢鳴果有孫恩之賊

舊說鄞西北有石鼓懸著山旁鳴則有軍兵動零陵永
正鄉有鳴石二所其一狀如鼓俗名石鼓泉陵縣有石

鼓儺聞數十里今無聲

王韶之南康記曰寧都溪之西有一山狀如鼓相傳謂之石鼓去縣三里壁立百餘丈赫然似朝霞初暉異於凡石

盛弘之荊州記曰建平郡南陵縣有石鼓南有五龍山山峯巉峽凌雲濟竦狀若龍形故因為名

詩晉庾闡觀石鼓詩曰命駕觀竒逸徑騫造靈山朝濟清溪岸夕憩五龍泉鳴石含潛響雷駭震九天妙化非

不有莫知神自然翔霄拂翠嶺緣澗漱巖間手澡春泉
潔目翫陽葩鮮

石門山

遠瀟師廬山記曰西南有石門山其形似雙闕壁立千
餘仞而瀑布流焉

周景式廬山記曰石門山在康皇東北八十餘里是一
山之大谷有澗水亦名石門澗吐源渡遠為衆泉之宗
每夏霖秋潦轉石發樹聲動數十里

劉禎京口記曰石門二山頭相對高二十餘丈廣六十餘步謂為石門行道所經

謝靈運名山志曰石門山兩巖間微有門形故以為稱瀑布飛瀉丹翠交曜

詩宋謝靈運登石門竄高頂詩曰晨策尋絕壁夕宿在山棲疏峯抗高館對嶺臨迴溪長林羅戶穴積石擁階基連巖覺路塞密竹使逕迷來人忘新術去子慙故蹊
聒聒夕流駛噉噉夜猿啼沉冥豈別理守道自不攜心

契九秋翰目翫三春萸惜無同懷客共登青雲梯又石
門巖上宿詩曰朝搴苑中蘭畏彼霜下歇暝還雲際宿
弄此石上月鳥鳴識夜棲木落知風發異音同致聽殊
響俱清越美人竟不來陽阿徒晞髮

書梁吳筠與顧章書曰僕去月謝病還覓薜蘿梅溪之
西有石門山者森壁爭霞孤峯限日幽岫含雲深溪蓄
翠蟬吟鶴唳水響猿啼英英相雜綿綿成韻既素重幽
居遂葺宇其上幸富菊華偏饒竹實山谷所資於斯已

辦仁智所樂豈徒語哉

太平山

孔臯會稽記曰餘姚縣南百里有太平山山形似繖四角各生一種木木不雜糅三陽之辰華卉代發

孔靈符會稽記曰餘姚江源出太平山東至漢口入海詩齊孔稚珪遊太平山詩曰石險天貌分林交日容缺陰澗落春榮寒巖留夏雪

銘晉孫綽太平山銘曰崑我太平峻踰華霍秀嶺樊縕

奇峰挺聳上千翠霞下籠丹壑有士冥遊默往奇託肅
形枯林映心幽漠亦既覲止渙焉融滯懸棟翠微飛宇
雲際重巒蹇厓迴溪縈帶被以青松灑以素瀨流風佇
芳翔雲停謁

岷山

尚書禹貢岷山導江東別為沱

河圖曰岷山之地為井絡帝以會昌神以建福上為天井
贊晉郭璞岷山贊曰岷山之精上絡東井始出一勺終

致水淋溟作紀南夏天清地靜

會稽諸山

吳越春秋曰范蠡作城訖怪山自至怪山者琅邪東武海中山也一夕自來百姓怪之故曰怪山

孔子家語曰禹會諸侯於塗山防風氏後至禹戮之其骨卑車

越絕書曰雞山豕山者句踐以畜雞豕將伐吳以食死士孔臯會稽記永興縣東北九十里有余山傳曰是塗

山案越書禹娶於塗山塗山去山陰五十里檢其里數
似其處也又縣東南十八里有射的山遠望的的如射
侯謂之射的射的之西有石室壁方二丈謂之射堂傳
云羽客之所遊憩土人常以此占穀食貴賤射的明則
米賤闇則貴嘑曰射的白斛一百射的玄斛一千又曰
縣東北六十里有土城山句踐索美女以獻吳王得諸
暨亭羅山賣薪女西施鄭旦先教習於土城山山邊有石
云是西施澣紗石又曰東有秦望山昔秦始皇登此使

李斯勒石其碑見在

孔靈符會稽山記曰會稽山南有宛委山其上有石俗呼石匱壁立干雲有懸度之險升者累梯然後至焉昔禹治洪水厥功未就乃躋於此山發石匱得金簡玉字以知山河體勢於是疏導百川各盡其宜又曰射的山西南水中有白鶴常為仙人取箭曾刮壤尋索遂成此山也

詩晉王彪之登會稽刺石山詩曰隆山嵯峨崇巒岩峩

俯觀滄洲仰拂玄霄文命遠會風淳道遠秦皇遐巡邁
茲英豪宅靈基阿銘跡峻嶠青陽曜景時和氣淳修嶺
增鮮長松挺新飛鴻振羽騰龍躍鱗

贊晉郭璞會稽山贊曰禹徂會稽爰朝羣臣不虔是討
乃戮長人玉璽表夏玄石勒秦

交廣諸山

顧微廣州記曰南海增城縣有白水山有瀑布懸注百
許丈又曰南海始昌縣有一石望之似牛向江名曰牛

鼻山縣西有夫廬山高入雲霄世傳云上有湖水至甲戌日輒聞山上有鼓角笳簫鳴響又曰南海四會縣有金岡山行人徃徃見金人見形岡側又曰東莞寶安縣有參里山傳云曾參純孝其所居山林後以為名又曰鬱林郡北有大山其高隱天上有池有石牛在池下民常祀之歲旱百姓殺牛祈雨以牛血和泥厚泥石牛背祠畢天雨洪注洗石牛背泥盡而後晴

劉欣期交州記曰浮石山海中而峙高數十丈浮在水

上又曰有一山神功刻鏤若射棚去石堂口百步夜常聞射聲

裴氏廣州記曰蒼梧彰平縣有石膏山望之皎若霜雪賦宋謝靈運嶺表賦曰若乃長山款跨外內乖隔下無伏流上無夷跡麇兔望岡而旋歸鴻雁覩峯而反翮既陟麓而踐坂遂升降於山畔顧後路之傾嶽眺前登之絕岸看朝雲之抱岫聽夕流之注澗羅石基布怪譎橫越非山非阜如樓如闕斑采類繡明白若月蘿蔓絕攀

苔衣流滑

水部上

總載水
淮水

海水
漢水

河水
洛水

江水

總載水

易說卦曰坎為水潤萬物者莫潤於水

尚書曰湯湯洪水方割蕩蕩懷山襄陵浩浩滔天

穀梁傳曰水北為陽水南為陰

左傳曰潢汙行潦之水可薦於鬼神可羞於王公又曰

共工氏以水紀官故為水師而水名

說文曰浦水濱也

禮記曰水曰清滌又曰今夫水一勺之多及其不測黿
鼉蛟龍魚鼈生焉貨財殖焉

毛詩曰揚之水不流束薪

穆天子傳曰天子飲于溥水之上

尚書大傳曰非水無以准萬里之平非水無以通道任
重也

韓詩外傳曰夫水者緣理而行不遺小似有智者重而

下似有禮者蹈深不疑似有勇者鄆防而清似知命者
歷險致遠似有德者天地以成羣物以生國家以寧萬
事以平此智者所以樂於水也又曰夏不數浴非愛水
也冬不數煬非愛火也

論語曰智者樂水又曰子在川上曰逝者如斯夫不舍
晝夜

老子曰上善若水水善利萬物而不爭處衆人之所惡
故幾於道

文子曰混混之水濁可以濯吾足青青之水清可以濯
吾纓又曰水之性欲清沙石穢之人之性欲平嗜欲害
之

晏子曰景公問廉政何如對曰其行水也美哉水平其
濁無不塗其清無不灑

墨子曰古語曰君子不鏡於水而鏡於人鏡於水見面
之容鏡於人則知吉凶

尸子曰凡水其方折者有玉其圓折者有珠清水有黃

金

孟子曰觀於海者難為水遊於聖人之門者難為言又曰性猶湍水也決諸東方則東流決諸西方則西流人性之無分於善惡也猶水之無分於東西也

莊子曰水靜則明濁則混水靜猶明而況精神聖人之心靜乎又曰秋水時至百川灌河涘涯之間不辨牛馬於是河伯欣然自喜以天下之美為在已又曰夫水積也不厚則其負大舟也無力

淮南子曰往古之時九州裂水浩漾而不息於是女媧積蘆灰以止淫水又曰土地各以類生人是故清水音小濁水音大湍水人輕遲水人重

山海經曰剌山有獸焉名曰合窳見則天下大水其上有水焉甚寒而清帝臺之漿水也

玄中記曰天下之多者水焉浮天載地高下無不至萬物無不潤

博物志曰有八流水出名山渭出鳥鼠漾出蟠冢洛出

熊耳頰出少室汝出燕泉泗出陪尾溜出月台沂出太

山

永嘉郡記曰有柘林水有梧桐水有桃枝水

湘中記曰湘水至清雖深五六丈見底了了石子如櫟

蒲矢五色鮮明白沙如霜雪赤岸如朝霞

抱朴子曰左慈以氣禁水水為逆流一二丈禁水著中

庭露之大寒不冰

華陽國志曰朱倉少受學於蜀郡豆腐飲水以諷誦同

紫等憐其貧給米倉終不受

搜神記曰漢末零陵太守有女悅門下書佐使婢取盥手水飲之而有娠既而生子至能行太守抱兒使求其父兒直上書佐膝書佐推之兒仆地為水

車穎秦書曰王猛攻鄴慕容評距猛而恒賣水與軍人衆思為亂猛因得破之

續述征記曰梁鄒城西有籠水云齊孝婦誠感神明涌泉發於室內潛以續籠覆之由是無負汲之勞及家人

疑之時其出而搜其室試發此籠而泉遂瀆涌流漂居
宇故名曰籠水

詩陳祖孫登詠水詩曰龍川紫闕映珠浦碧沙沉岸闊
蓮香遠流清雲影深風潭如拂鏡山溜似調琴請君看
皎潔知有淡然心

賦魏文帝濟川賦曰臨濟川之魯淮覽洪波之容裔漚
騰揚以相薄激長風而亟逝滂浩汗而難測眇不覩其
垠際於是龜龍神嬉鴻鸞羣翔鱗介霍驛載止載行俯

嗟菁藻仰食若芳永號長吟延首相望美玉昭晰以曜
輝明珠灼灼而流光於是遊覽既歇日亦西傾朱旗電
曜擊鼓雷鳴長驅風厲悠爾北征思魏都以偃息託華
屋而遨遊酌玄清于金壘騰羽觴以獻酬又臨渦賦曰
建安八年經東國遵渦水相侔乎樹下駐馬書鞭作臨
渦之賦曰蔭高樹兮臨曲渦微風起兮水增波魚頡頏
兮鳥逶迤雌雄鳴兮聲相和萍藻生兮散莖柯春水繁
兮發丹華

晉應貞臨丹賦曰陟綿岡之迢邈臨窈谷之濬遐覽丹
源之洌泉眷懸流之清派漱玄瀨而漾沚順黃崖而蕩
博激重巖之絕根拂崇丘之飛甍然後陰乘洞出邊澮
旁開倏熠高驚皓暄長懷盤溢鬱沒雲轉颺迴屏側為
之飛隕壁岸為之陂隤列以青林蔭以綠枝檉松蒼茸
於其側楊柳婀娜乎其下則高溜承崖懸泉屬嶺別流
分注冰瑩玉靜清波引鏡形無遁影

晉左九嬪涪涇賦曰覽庶類之肇化何涪涇之獨靈稟

陰精以運景因落雨而結形不係根於獨立故假物以資生體珠光之皎皎若凝霜之初成色鮮熠以熒熒似融露之將溽亾不長消存不久寄其成不欲難其敗亦以易也

贊晉顧愷之水贊曰湛湛若凝開神以質乘風擅瀾妙齊得一

晉庾肅之水贊曰湛湛涵淥清瀾澄濬妙質柔明雲深皮潤

晉殷仲堪水贊曰大象無形氣以分麓淡淡冲津質有
雖虛清瀾可瀨明激弗渝孰能懷之汎然靡拘

晉孔甯子水贊曰澄鑒無虛積之成川湍飛瑩谷激石
冷然

晉郭璞釋水贊曰川瀆綺錯渙瀾流帶潛潤旁通經管
華外殊出同歸混之東會又弱水贊曰弱出崑山鴻毛
是沉北淪流沙南暎火林惟水之奇莫測其深

海水

尚書曰江漢朝宗于海

山海經曰無臯之山南望幼海又曰發鳩之山有鳥名
曰精衛是炎帝之女往遊于東海溺而不反是故精衛
常取西山之木石以填東海又曰大荒中有山名曰天
臺海水出焉

老子曰江海所以能為百谷王者以其善下故能為百
谷主

淮南子曰海不讓水積以成其大

謝承後漢書曰汝南陳茂嘗為交趾別駕刺史周敞涉海遇風船欲覆沒茂拔劍呵罵水神風即止息

博物志曰舊說天河與海通近世有居海渚者年年八月有浮楂來過甚大徃反不失期此人乃多齎糧乘楂去忽忽不覺晝夜奄至一處有城郭屋舍望室中多見織婦見一丈夫牽牛渚次飲之此人問此為何處荅曰問嚴君平此人還問君平君平曰某年某月有客星犯牛斗即此人乎又曰漢使驃騎將軍霍去病北伐單于

至瀚海而還

王隱晉書曰慕容晃上言曰臣躬征平郭遠假陛下之威將士竭命精誠感靈海為結冰凌行海中三百餘里臣自立國及問諸故老初無海水冰凍之歲

神仙傳曰麻姑謂王方平曰自接待以來見東海三為桑田向到蓬萊水乃淺於往者略半也豈復為陵乎

論語曰道不行乘桴浮於海從我者其由也與

莊子曰南海之帝為儵北海之帝為忽中央之帝為渾

沌儵與忽時相與遇於渾沌之地渾沌待之甚厚儵與忽謀報渾沌之德曰人皆有七竅以視聽食息此獨無有嘗試日鑿一竅七日而渾沌死又曰窮髮之北有溟海者天池也有魚名曰鯢化而為鳥名曰鵬又曰東海之鼈謂埳井之鼃曰夫海千里之遠不足以舉其大千仞之高不足以極其深禹之時十年九潦而水弗加益湯之時八年七旱而涯不減損夫不為頃久推移不以多少進退者此亦東海之大樂也又曰海水三歲一周流

波相薄故地動

韓詩外傳曰成王時有越裳氏重三譯而朝曰吾受命國之黃髮曰久矣天之不迅風雨海之不波溢也三年於茲矣意者中國有聖人乎盍往朝之

十洲記曰扶桑在碧海之中地一面萬里太帝之宮太真東王君所治處

玄中記曰天下之強者東海之惡焦焉水灌而不已惡焦者山名也在東海南方三萬里海水灌之而即消

周景式孝子傳曰管寧避地遼東經海遇風船人危懼
皆叩頭悔過寧思誓念向曾如廁不冠即便稽首風亦
尋靜

西域傳曰蒲昌海一名鹽澤

詩宋謝靈運遊赤石進帆海詩曰首夏猶清和芳草亦
未歇水宿淹晨暮陰霞屢興沒周覽倭瀛壖况乃凌窮
髮川后時安流天吳靜不發揚帆採石華挂席拾海月
齊謝朓望海詩曰滄波不可望望極與天平徃徃孤山

映處處春雲生差池遠雁沒颭沓羣鳬驚

梁劉孝標登郁洲山望海詩曰滄溟聯霄岫曾嶺鬱巔
峒下盤鹽海底上轉靈鳥翼溟渤非可辯鴻溶信難測
輕塵久弭飛驚浪終不息雲錦曜石嶼羅綾文水色

北齊祖孝徵望海詩曰登高臨巨壑不知千萬里雲島
相接連風潮無極已時看遠鴻度乍見驚鷗起無待送
將歸自然傷客子

賦後漢班叔皮覽海賦曰余有事於淮浦覽滄海之茫

茫悟仲尼之乘桴聊從容而遂行馳鴻瀨以縹鷺翼飛
風而迴翔顧百川之分流煥爛熳以成章風波薄其裒
衷邈浩浩以湯湯指日月以為表索方瀛與壺梁曜金
璆以為闕次玉石而為堂冀芝列於階路涌醴漸於中
唐朱紫彩爛明珠夜光松喬坐於東序王母處於西箱
命輯衆與岐伯講神篇而校靈章願結旅而自託因離
世而高遊騁飛龍之駿駕歷八極而迴周遂疎節而響
應忽輕舉以神浮遵霓霧之掩蕩登雲塗以凌厲乘虛

風而體景超太清以增逝麾天閭以啓路關閭闔而望
余通王謁於紫宮拜太一而受符

魏王粲遊海賦曰乘菌桂之芳舟浮大江而遙逝翼驚
風而長驅集會稽而一睨登陰隅以東望覽滄海之體
勢吐星出日天與水際其深不測其廣無臬章亥所不
極盧敖所不屆懷珍藏寶神隱怪匿或無氣而能行或
含血而不食或有葉而無根或能飛而無翼鳥則爰居
孔鵠翡翠鸕鶿繽紛往來沉浮翱翔魚則橫尾曲頭方

目偃額大者若山陵小者重釣石乃有貴蛟大貝明月
夜光鰐鼈瑇瑁金質黑章若夫長洲別島旗布星峙高
或萬尋近或千里挂林聚乎其上珊瑚周乎其趾羣犀
代角巨象解齒黃金碧玉名不可紀

魏文帝滄海賦曰美百川之獨宗壯滄海之威神經扶
桑而遐逝跨天崖而託身驚濤暴駭騰踊澎湃鏗訇隱
隣涌沸凌邁於是龜鼉漸離泛濫淫遊鴻鸞孔鵠哀鳴
相求揚鱗濯翼載沉載浮仰喙芳芝俛漱清流巨魚橫

奔厥勢吞舟爾乃釣大貝採明珠
寥懸黎收武夫窺大麓之潛林
覩搖水之羅生上蹇產以交錯
下來風之泠泠振綠葉以歲蕤
吐芬葩而揚榮

晉木玄虛海賦曰昔在帝媯臣唐之世
洪濤瀾汗萬里無際江河既導萬穴俱流
椅拔五嶽竭涸九州於廓靈海長為委輸
去聲其為怪則乃攷渙音渙潏潏浮天無岸波

如連山乍合乍散噓吸百川洗滌淮漢
若乃霾暄潛消莫振莫竦輕塵不飛纖羅不動
猶尚呀呷餘波獨涌若

乃邊荒速告王命急宣飛迅鼓檣浮海凌山於是候勁
風揭百尺維長梢挂帆席望濤遠決罔然鳥逝一越三
千不終朝而濟所屆若乃負穢臨深虛誓愆祈則有海
童邀路馬銜當蹊天吳乍見而髻髯蜩像暫曉而閃屍
爾其大量也則南滄朱崖北洗天墟東演析木西薄青
徐經綸瀲溟萬萬有餘吐雲霓含龍魚隱鯢鱗潛雲居
其垠則有天琛水怪鮫人之室瑕石詭暉鱗甲異質繁
綵揚華萬色隱鮮陽冰不冶陰火潜燃其魚則橫海之

鯨突抗孤遊茹鱗甲吞龍舟若其毛翼產鰈剖卵成禽
鳧雛離徙鶴子淋滲羣飛侶浴戲廣浮深且其為器也
苞乾之奧括坤之區唯神是宅亦祇是廬何奇不有何
怪不儲茫茫積流含形內虛曠哉坎德卑以自居

晉潘岳滄海賦曰徒觀其狀也則湯湯蕩蕩瀾漫形沉
流沫千里懸水萬丈測之莫量其深望之不見其廣無
遠不集靡幽不通羣溪俱息萬流來同含三河而納四
瀆朝五湖而夕九江陰霖則興雲降雨陽霽則吐霞曜

日煮水而鹽成剖蚌而珠出其中有蓬萊名嶽青丘奇
山阜陵別島環其間其山則螺崔嵬崢嶸嵯峨降屈披
滄流以特起擢崇基而秀出其魚則有吞舟鯨鯢鰓鰈
龍鬚蜂目豺口狸斑雉軀怪體異名不可勝圖其虫獸
則素蛟丹虬元龜靈鼉修龜巨鼈紫貝騰虵玄螭蚴虬
赤龍焚蘊遷體改角推舊納新舉扶搖以抗翼泛陽侯
以濯鱗其禽鳥則鷗鴻鸛鷖鵠鵠鵠鵠朱背煇爛縹翠
葱青詳察浪波之來往遍聽奔激之音響力勢之所迴

薄潤澤之所彌廣普天之極大橫率土而莫兩

晉庾闡海賦曰昔禹啓龍門羣山既鑿高明澄氣而清
浮厚載勢廣而盤礴灌注百川控清引濁始乎濫觴委
輸大壑若夫長風鼓怒涌浪碎礧颺波於萬里之間漂
沫於扶桑之外於是百川輻湊四瀆橫通迴颺決滌聳
散穹隆映曉雲而色暗照落景而俱紅驚浪堯我耿漫
泖汨瀟淋潺湲浮天沃日鯨鯢蘊而乍見虬螭涌而競
遊靈鼉朱鼈出沒爭浮騰龍掣水巨鱗吞舟

晉孫綽望海賦曰五湖同浸九江叢漑抱河含濟吞淮
納泗南控沅湘西引涇渭洲渚迢遞以䟽屬島嶼綿邈
以牢羅殖崑崔之碣石構穹隆之牂柯玄臬之府重双
之房鱗彙萬殊甲產無方包隨珠銜夜光璫瑁熠爍以
泳游蜻螭煥爛以映漲虛貝含素而表紫嚵螺絡丹而
帶紺青甲芬飈以微扇玄木杳眇以舒芳其卉木則綠
苔石髮蔓以流綿紫莖萑綜解以被渚華組依波而錦
披翠綸扇風而繡舉長鯨嶽立以截浪虬鰓揚鬐以排

流巨鼇翮肩以冠山鳥鰲呼翕以吞舟鵬為羽桀鯢稱
介豪翼遮半天背負重霄舉翰則宇宙生風抗鱗則四
瀆起濤考萬川以周覽亮天池之綜緯彌綸八荒亘帶
九地昏明注之而不溢尾閭洩之而不匱

齊張融海賦曰爾其海之狀也則窮區沒渚萬里藏岸
控會河濟朝宗江漢湍轉則日月似驚浪動則星河如
覆展轉從橫揚珠起玉峯勢崇高岫形參錯或如前而
未進乍非遷而已却却瞻無後向望何前長尋高眺唯

水與天若乃山橫颶浪風倒摧波磊若驚山碣嶺以疎
石鬱若飛烟奔雲以振柯連瑤光而交彩接玉繩以通
華爾其奇名出錄詭物無書高岸乳鳥橫闕產魚蠃螭
瑇瑁綺貝繡螺玄珠牙采綠紫相華

河水

山海經曰崑崙山河水出焉又曰陽紆之山河出其中
陵門之山河出其中

毛詩曰新臺刺衛宣公也納伋之妻作新臺于河上而

要之國人惡之而作是詩也新臺有泚河水洶洶又曰
誰謂河廣一蒿航之誰謂宋遠跂予望之

左傳曰周詩有之曰俟河之清人壽幾何又曰楚昭王
有疾卜河為祟大夫請祭王曰江漢沮漳楚之望也河
非所獲罪遂弗祭

穀梁傳曰梁山崩壅遏河三日不流晉君召伯尊伯尊
過遇輦者問焉輦者曰君親素縞帥羣臣哭之既而祠
焉伯尊至君問之伯尊如其言而河流矣

孝經援神契曰河者水之伯上應天漢

呂氏春秋曰古龍門未開呂梁未發河出孟門大溢逆流名曰洪水禹乃決流䟽河為彭澧之漳所活者千八百國此禹之功也

史記曰元光中河決於瓠子於是天子已用事萬里沙則還臨決河沉白馬玉璧於河令羣臣從官自將軍以下皆負薪填決河而取淇園之竹以為楨天子既臨河決悼功之不成乃作瓠子之歌又曰秦滅六國自以獲

水德之瑞更名河曰德水

韓詩外傳曰申徒狄非其世將自投於河崔嘉聞而止之曰聖仁之人民之父母也今為濡足不救溺人可乎申徒曰昔桀殺龍逢紂殺比干而亡天下吳殺子胥陳殺泄冶而滅其國非無聖智不用故也遂負石而沉於河

淮南子曰河以逶蛇故能遠又曰河水九折注海而流不絕者有崑崙之輸也

物理論曰河色黃赤衆川之流蓋濁之也百里一小曲
千里一大曲一直

爾雅曰水自河出為雍河出崑崙壩色白

山海經曰積石之山其下有石門河水冒以西南流

莊子曰河潤九里澤及三族

楚辭曰與汝遊兮九河衝風起兮水揚波

詩梁范雲度黃河詩曰河流迅且濁湯湯不可凌檜楫
難為楠松舟纔自勝空亭偃舊水荒疇餘故塍不覩行

人跡但見狐兔興寄言河上老此水何當澄

賦晉成公綏大河賦曰覽百川之弘壯莫尚美於黃河
發崑崙之峻極出積石之嵯峨

魏應瑒靈河賦曰咨靈川之遐原于崑崙之神丘衝積
石之重險披山麓而溢浮涉津路之峻泉播九道乎中
州汾鴻踊而騰騖恒疊疊而徂征肇乘高而迅逝陽侯
沛而振驚有漢中葉金隄隤而瓠子傾興萬乘而親務
董羣后而來營下淇園之豐篠投玉璧而沉星若夫長

杉峻攢茂括芬樞扶流灌列映水蔭防隆條動而暢清
風白日顯而曜殊光

頌宋鮑昭河清頌曰夫四皇六帝樹聲長世大寶也澤
浸羣生國富刑清鴻德也制禮裁樂淳風遷俗文教也
誅筭錫黠束顧象闕武功也鳴鳥躍魚滌穢河渠至祥
也大寶鴻德文教武功其崇如此幽明同贊神祇與能
厥應如彼唯天為大堯寶則之抑又聞之勢之所覃者
淺則美之所傳者近道之所感者深則慶之所流者遠

聖命誰謚皇厯攸歸謀從筮協神與民推黃旗西映紫
蓋東暉納瑞璫玉升政衡璣注彼四瀆媚此雙川伏靈
遙紀閔貺遐年澄波崑丘鏡流葱山

銘後漢李尤河銘曰洋洋河水赴宗于海經自中州龍
圖所在昔周武諸侯會于孟津魚入王舟乃往剋殷大
漢承緒懷附遐鄰邦事來濟各貢厥珍

江水

尚書禹貢岷山導江東別為沱又曰三江既入震澤底

定

春秋元命苞曰牛女為江潮江潮者所以開神潤化故其氣湍急

孫卿子曰子路盛服見孔子孔子曰由是禴禴者何也在昔江出於汶山其始出源可以濫觴及其至江之津也不方舟不避風不可涉也非唯下流水邪今汝衣服既盛顏色充盈天下且孰肯諫汝乎

列女傳曰楚昭王貞姜齊女也昭王出遊留夫人漸臺

江水大至使使者迎夫人忘持符夫人不肯出使者還
取符未及臺已壞流水而死又曰廣漢姜詩妻事姑至
孝姑好飲江水水去家七里妻常雞鳴泝流而汲而阻
風雪不時得水詩責遣之妻寄隣家紡績給與詩聞追
還舍側立有涌泉出味如江水

謝承後漢書曰吳郡王閔渡錢塘江遭風船欲覆閔拔
劍斫水罵伍子胥水息得濟

吳志曰魏文帝出廣陵望大江曰彼有人焉未可圖也

乃還

吳錄曰書云三江既入震澤底定震澤吳西南太湖也
又曰步騭表言此降人說北多作布囊欲以盛沙塞大
江吳主見呂岱說騭言北欲以沙囊塞江每讀其表輒
獨失笑此江自開闢以來寧可以囊塞之乎

詩梁沈約泛永康江詩曰長枝萌紫葉清源泛綠苔山
光浮水至春色犯寒來臨睨信永矣望美暖悠哉寄言
幽閨妾羅袖勿空裁又渡新安江貽京邑遊好詩曰春

言訪舟客茲川信可珍
洞澈隨深淺皎鏡無冬春
千仞寫高樹百丈見遊鱗
紛吾隔踞滓寧可濯衣巾
願以潺湲水霑君纓上塵

梁任昉濟浙江詩曰昧旦乘輕風
江湖忽來往或與歸波送乍逐翻
流上近岸無暇目遠峰更興想綠
樹懸宿根丹崖頽久壤又嚴陵瀨
詩曰羣峯此峻極叅差百重嶂清
淺既漣漪激石復奔壯神物徒有造
終然莫能狀梁劉孝綽和太子落日
望水詩曰川平落日迴落照滿

川漲復此淪波地派引別沮漳耿耿流長脉熠熠動輕
光臨泛自多美况乃還故鄉擣人夜理檝棹女閨成粧
欲待春江曙爭塗向洛陽

梁王臺卿臨滄波詩曰高軒臨不測清江窮廣深天邊
生岸影水上結雲陰風來白華起潮滿黃沙沉又泛江
詩曰春江下白帝畫舸向黃牛錦纜迴沙磧蘭橈避荻
洲濕花隨水泛空巢逐樹流岸社多喬木山城足迴樓
陳陰鏗晚出新亭詩曰大江一浩蕩離悲足幾重潮落

猶如蓋雲昏不作峯遠戍唯聞鼓寒山但見松九十方
稱半歸途詎有蹤

賦東晉郭璞江賦曰咨五才之並用寔水德之靈長惟
岷山之導江初發源於濫觴總括漢泗兼包淮湘并吞
沅澧汲引沮漳源二分於岨岨流九派乎潯陽鼓洪濤
於赤岸淪餘波於柴桑注五湖以漫漭灌三江而澎湃
滂汗六州之域經營炎景之外呼吸萬里吐納靈潮自
然徃復或多或朝若乃巴東之峽夏后䟽鑿絕岸萬丈

壁立霞駁碧沙瀆漉而往來巨石硨磲以前却魚則江
豚海獺叔鮪王鱣鰐鯨鯢鮫鯨鯢鯢鯢鯢鯢鯢鯢鯢鯢
則有王珧海月土肉石華瑣蛞腹蟹水母目蝦紫蚶如
渠洪蚌專車瓊蚌晞曜以瑩珠石蚌應節而揚葩若乃
龍鯉一角奇鴈九頭有鼈三足有龜六眸頰鰓肺躍而
吐璣文鮀磬鳴以孕璆駉馬騰波以噓蹠水兕雷咆乎
陽侯電布餘糧星離沙鏡青綸競紉縹組爭映石帆蒙
籠以蓋嶼萍實時出而漂泳其下則金礦丹礫雲精燭

銀鳴石列乎陽渚浮磬肆乎陰濱其羽族則有晨鵠天
雞鴈鷺鷥鴈千類萬聲自相誼聒繁蔚芳離隱藹水松
涯灌芊萋潛蒼葱龍爰有包山洞庭巴陵地道潛達倚
通幽岫窈窕金精玉英瑱其裏瑤珠怪石綽其表海童
之所巡遊琴高之所靈矯冰夷倚浪以傲睨江妃含嚙
而聯眇若乃宇宙澄寂八風不翔舟子於是搦櫂涉人
於是攬榜漂飛雲運餘艗舳舻相屬萬里連檣沂洄沿
流或漁或商長風颭以增扇廣莫颭音麗而氣整徐而不

懸疾而不猛鼓帆迅越趨漲截澗倏忽數百千里俄頃
於是蘆人漁子擯落江山衣則羽褐食惟蔬鱸或揮輪
於懸碕或中瀨而橫旋忽忘夕而宵歸詠米菱以叩舷
及其譎變儵恍符祥非一動應無方感事而出經紀天
地錯綜人術妙不可盡之於言事不可窮之於筆

晉庾闡涉江賦曰發中州之曲沔昔石頭之岩岨溯晨
風而遙邁乘濤波而容與於是時也夕日將昏天吳駭
奔陽侯漂海若泛江豚爾乃雲霧勃起風流溷淆排岩

拒瀨觸石興濤澎湃洗潭鬱怒咆哮迴連波以岳墜壑
后土而川宵總百川之殊勢集朝宗乎滄浪注天波於
析水激東極乎扶桑體含弘而彌泰道謙尊而逾光齊
山海以比量冠百谷而稱王此則水之勢也且夫山川
環怪水物含靈鱗千其族羽萬其名毛羣詭觀倮類殊
形明月晞光以夕耀金沙逐波而吐瑛撫檝中流汨徂
西土過乎歷陽之津迄乎橫江之浦若乃越三江之下
口眇濡湏以逕渡邈天險之遐勢歷習坎之重固川瀆

泓澄以含景山水渾渾而鱗布

晉曹毗涉江賦曰迄趙屯歷彭川修岸靡靡莞菁芊芊
紫蓮被翠波而抗英碧棹乘天岸而星懸百籟夕奏山
精夜燃狂飈蕭瑟以洞駭洪濤突兀而橫峙爾乃江狶
彭淖夜火輝煥凌錯吐飈駭鯨噴瀾采蜂於是汎波文
魚於是登岸

歌晉夏侯湛江上泛歌曰悠悠兮遠征倏倏兮暨南荆
南荆兮臨長江臨江河兮討不庭江水兮浩浩長流兮

萬里洪浪兮雲轉陽侯兮奔起驚翼兮垂天鯨魚兮岳
峙靡無紛兮被臯陸修竹鬱兮翳崖趾望江之南兮遨
目桂林桂林蒼鬱鬱兮鷗鷺揚音凌波兮願濟舟楫不具
兮江水深沉嗟迴盼於北夏何歸軫之難尋

淮水

尚書禹貢曰道淮自桐柏

毛詩曰率彼淮浦省此徐土

水經曰淮水出南陽平氏縣昭稽山東北過桐柏山

山海經曰淮水出餘山山在朝陽義鄉西入海

賦魏文帝浮淮賦曰建安十四年師自譙東征大興本
軍泛舟萬艘雖孝武舳艫千里殆不過也沂淮水而南
邁泛洪潭之皇波仰岩岡之隆阻經東山之曲阿於是
驚風泛涌波駭衆帆張羣櫂起爭先逐進莫過適相待
魏王粲浮淮賦曰從王師以南征浮淮水而遐逝背渦
浦之曲流望馬丘之高溼於是迅風興濤波動長瀨潭
浪滂沛涵溶

漢水

山海經曰嶠冢之山漢水出焉東南流注於江

尚書禹貢曰嶠冢導漾東流為漢

毛詩曰漢廣德廣所及也文王之化被乎南國美化行
於江漢之域漢有游女不可求思

左氏傳曰屈完謂齊桓公曰楚國方城以為城漢水以
為池

詩梁簡文帝玩漢水詩曰雜色崑崙水泓澄龍首渠豈

若茲川麗清流疾且徐離離細磧淨藹藹樹陰疏石衣
隨溜卷水芝扶浪舒連翩寫去檝鏡澈倒遙墟聊持點
纓上於是察川魚

賦後漢蔡邕漢津賦曰夫何大川之浩浩披厚土以載
形納陽谷之所吐兼漢沔之殊名總畎澮之羣液演西
土之陰精過曼山以左廻遊襄陽而南縈於是遊目騁
觀南援三州北集京都上控隴坻下接江湖導財運貨
懋遷有無既乃風焱蕭瑟勃焉並興陽侯沛以奔驚洪

濤涌以沸騰願乘流以上下窮滄浪乎三涘觀固宗之
形兆看洞庭之交會

洛水

山海經曰洛水出洛西山東北注河入成臯之西

易曰河出圖洛出書聖人則之

尚書曰道洛自熊耳東北會於澗瀍

國語曰靈王二十二年穀洛龍鬬將毀宮室王欲壅之
太子晉曰夫山土之聚也藪物之歸也川氣之導也澤

水之鍾也夫水聚於高歸於下今吾執政無乃實所僻
而禍夫二川之神王卒壅之王室大亂

淮南子曰雒水輕利宜禾

謝承後漢書曰沛國陳宣建武十年雒水出造天津城
門或欲築塞之宣諫曰昔王尊正身金堤水退汎聖人
邪言未絕而水去

漢宮典職曰德陽殿周遊客萬人自偃師去宮四十五
里激洛水於殿下

詩太宗皇帝臨洛水詩曰春蒐馳駿骨揔轡俯長河霞
處流縈錦風前濺卷羅水花翻照樹隄蘭倒插波豈必
汾陰曲秋雲發棹歌

蘇味道和受圖溫洛詩曰綠綺應河檢青壇俯洛濱天
旋俄制蹕孝享屬嚴禋陟配光三祖懷柔洎百神霧開
中道日雪歛屬車塵預奉咸英奏長歌億萬春

李嶠和拜洛詩曰七萃鑾輿動千年瑞檢開文如龜負
出圖似鳳銜來殷薦三神享明祠萬國陪周旗黃鳥集

漢幄紫雲迴日暮鈎陳轉清歌上帝臺

牛鳳及和受圖溫洛詩曰八神承玉輦六羽驚瑤溪戒
道伊川北通旌澗水西御圖開洛匱刻石與天齊瑞日
波中上仙禽霧裏低微臣矯弱翮抃舞接鸞翳

賦魏曹子建洛神賦曰余從京城言歸東藩背伊闕越
輶轅經通谷凌景山容與乎陽林流眄乎洛川覩一麗
人于巖之畔乃援御者而告之曰彼何人斯若此之艷
也御者對曰臣聞河洛之神名曰宓妃君王所見無乃

是乎余告曰其形也翩若驚鴻婉若游龍髣髴兮若輕
雲之蔽月飄飄兮若流風之迴雪於是忽焉縱體以游
以嬉左倚采旄右蔭挂旗攘皓腕於神滸採湍瀨之玄
芝收和顏而靜志兮申禮防以自持爾乃衆靈雜還命
儔嘯侶或戲清流或翔神渚或采明珠或拾翠羽從南
湘之二妃攜漢濱之游女體迅飛鳧飄忽若神凌波微
步羅襪生塵於是屏翳收風川后靜波馮夷鳴鼓女媧
清歌騰文魚以警乘鳴玉鑾以偕逝六龍儼其齊首載

雲車之容裔

藝文類聚卷八